



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : Tir Yimyim

tiryimyim@aolima

tir yimyim

TAPAK 7

ICC T20I rankings: Suryakumar Yadav maneni temaba jenjang nung lir

Kim Jong Un-i spy satellite yoktsü tuyuogo



VOL. XX NO. 187 (ADOK 187) DIMAPUR YANGTEPNÜ (THURSDAY) RONGCHII (APRIL) 20, 2023 ₹ 5.00

MCCI-i tashiyim agi sen saruba anentsü tuyur

Dimapur, April 19, 2023 (TYO): Mokokchung jila nung tesüiba anogo ishika tsüingda Naga nationalist groups züingsem kari shishilembartem dang nungi tashiyim agi sen meshia senzüba osang angazükogo ta Mokokchung Chamber of Commerce & Industry (MCCI)-i metetdaksü.

Tenla meshiba, tax saruba mesüra ibala mesükba mapa inyakba ajak public-i noktanga lir. Anungji ozü züingsemtem dak tashiyim mapa inyakba onoki magizük, ta MCCI-i metetdaksü. Nagaland nung kanga dang tiptema aliba major urban center

ji Mokokchung dang lir aser tebilemba tamajung bener senzür nisung shinga nema iba tensa meraksadaksütsü. Anungji Mokokchung jila nung shishilembartem dang nungi tashiyim agi sen saruba tangsa anentsü metetdaksür, ta MCCI-isa ashi.

Maneni, shishilembadak tashiyim agi sen sarurtem senzüba metetra MCCI Office nem osang sangoktsütsü shishilembar ajak dang tuyur. Nisung kari danga iba tayongzükba alema sen agütsüra ibaji pei tebilemstü khuret asütsü, ta MCCI-isa metetdaksü.

Dimapur nung ILP maparen tenzük

Dimapur, April 19, 2023 (TYO): Dimapur District nung Inner Line Permit (ILP) maparen tenzük aotsü ta Deputy Commissioner Sachin Jaiswal, IAS-i metetdaksüog.

Dimapur District-i transit passenger ka ama süiba nisung ket nung ILP maliyonga kecha masü saka pa/la ket nung ticket kuli tejangja alitsüla. Iba dak alaka Dimapur District-i arur non-indigeneus ajaki Inner Line Permit (ILP) bener arutsüla, ta DC-i metetdaksü.

November 21, 1979 sülen Dimapur district-i arur non-

indigenous nisung shiai iba sangdong agütsüba sülen anogo 30 tsüingda Deputy Commissioner, Dimapur indang office nung Inner Line Permit (ILP) meshitsüla. Tashi mangartem Bengal Eastern Frontier Regulation 1873 (BEFR Act) kübok temerenshi alitsü ta paisa ashi.

Dimapur district nung Inner Line Permit (ILP) mita repringtsü aser mapa küma inyaksü asoshi District Administration aser Police indang Joint Task Force ka tentetsü, ta DC Sachin-isa metetdaksüog.

India nung nisung 10,542 dak Covid putet

Nw Delhi, April 19, 2023 (Agencies): India nung Bodbarnep 8:00 ako tashi tesüiba ghonda 24 tsüingda nisung 10,542 dak Covid putetogo ta Union Health Ministry-i metetdaksü.

Parnok züingsema India nung tang nisung 63,562 anepaludar ta Ministry-isa ashi.

Maneni, kasa mapang tsüingda Covid puteta alir nisung 38 asü aser parnok züingsema tasür ajak agi 5,31,190 kümogo.

India kübok tesem balala nung COVID-19 kanga putetba atema Principal Secretary to Prime Minister Dr PK Mishra-i Bodbarnü senden ka ayonga

menogo. "India nung state 8 (Kerala, Delhi, Maharashtra, Haryana, Uttar Pradesh, Tamil Nadu, Karnataka aser Rajasthan) nung Covid teimba puteter" ta Secretary, Health and Family Welfare Rajesh Bhushan-i ashi.

State sorkartemi Union Ministry of Health nungi temelaba magii dang Covid vaccine yanglurtem dang nungi indangindanga nüngdakba Covid vaccine alizüktsü atema osang sangoktsüog, ta Mishra-isa ashi.

"State balala nung nija mozü kitemia vaccine yanglurtem dang nungi indangindanga vaccine alitsü akok" ta paisa ashi.

NMC-i Nagaland medical college lapoktsü melar



April 19, 2023 nü Health and Family Welfare Minister, P. Paiwang Konyak aser Commissioner and Secretary HFWY. Kikheto Sema na den ketdangsurtemi osangbener den jembiba angur.

Kohima, April 19, 2023 (TYO): National Medical Council (NMC)-i Nagaland yimtiba Kohima nung medical college maparen tenzük aotsü atema temelaba agütsüog. NMC-i academic session 2023-24 tenzüktsü mulungogo aser iba ya menden 100 atema lir. Iba temelaba anguba ajanga June-July nungi Nagaland Medical College tenzüktsü imlar.

"Mongulbarü National Medical Commission, Medical Assessment & Rating Board (NMC, MARB) ajanga academic year 2023-24 nung MBBS menden 100 atema 'Letter of Intent' (LoI) agütsüog" ta Health and Family Welfare Minister, P. Paiwang Konyak-i ashi.

Nagaland sorkari hopta ka tsüingda acceptance letter yoktsü aser iba ajanga MARB ajanga academic year 2023-24 atema MBBS menden 100 indang 'Letter of Permission' agütsütsü ta pai ashi.

Nagaland state ngur küm 60 sülen Medical College ka tenzüktsüba ya Nagaland nung alirtem atema otsütsü anogo ka lir. Tesüiba aser tang teinyakdak asen lenirtem taginüba tongtetogo, ta Minister Paiwang-isa ashi.

NMC indang MARB-i January 10, 2023 nü ajungbena dang Medical College semdanga liasü. Iba dang Nagaland Institute of Medical Sciences & Research (NIMSAR), Kohima ta ajar aser parnoki infrastructure, nübo nung temulung masüba agi February 1 nü show-cause notice agütsü, ta paisa metetdaksü.

Iba sülen H&FW Commissioner and Secretary Y. Kikheto Sema-i February 7 nü Agreement, Affidavit aser Compliance Report agütsü.

Iba Compliance Report nung May 31, 2023 tashi nung MBBS menden 100 atema academic session 2023-24 tenzük aotetsü ta ashi. Ano March 6 nü tanabuba Compliance Agreement, Affidavit agütsü.

March 27 nü NMC indang MARB ajanga ajungbena Medical college semdanga liasü aser idangji infrastructure, hospital, nübo ngua temulung asüba metetdaksü.

"NMC nungi LOI/LOP anguba ya tatem masü saka Medical College tenzük aotsü atema tetenzükba lir. Anungji nübortem ajaki amalitep aser sarasadem nüngdaker" ta Minister Paiwang-isa ashi.

"Nagaland nung medical institute lapokba ya state aser linük atema mapa tajung ka inyaketba lir. NIMSAR ya rongsen ka lir aser iba reju lapoka aotsü atema teinyaktsü ajak inyakdar" ta NIMSAR indang Director & Dean Professor Dr Soumya Chakraborty-i ashi.

"NMC guidelines ajanga MBBS menden 100 nungi 15 ji all-India seats aser tanüingba menden 85 ji Nagaland atema lir. Ajsüaaka, menden tazüing kümra Nagaland nung alirtem nem agütsütsü" ta lai metetdaksü.

"Maneni linük nung mongintemi NIMSAR indang faculty züingsemtem shimer" ta Dr Soumya-isa ashi.

Kikheto Sema aser Dr Soumya Chakraborty naprongi state sorkar dang Keyakie nung aliba Urban Development Housing Complex ya NIMSAR staff quarters amshitsü atema ayongzük.

Bodbarnü Medical College yangluba tesem nung osangbener senden alidang Commissioner and Secretary HFWY. Kikheto Sema, Principal Director Health Dr. Vibeitunuo Mepfuo aser Dean of NIMSAR Dr Soumya Chakraborty nungertem liasü.

Minister Along-i ULBs & NSSB indang lemsatep

Kohima, April 19, 2023 (TYO): Urban local bodies nung tetsür nem 33% lemzüktsütsüba onük ya sorkar, kin hohotem aser civil societies tsüingda jungjunga olemteptsü nüngdaker, ta Minister Temjen Inma Along-i ashi.

Nagaland state sorkari tetsür nem 33% lemzükja ULB elections magitsü lemtetba ya okadak mezüingmeshiba lir ta Supreme Court-i ashiba atema "asen Chief Minister Rio aser cabinet-i teti ULB elections atema lemtet nung nisung ajak dendaktsünür, saka kasa mapang kin hohotem aser tongti teloktem indang inyaksangshi metettsü tim" ta Minister Along-i ashi.

Clean Kisama drive nung osangbenertem den sensaksem dang "ULB ya Naga nung taginüba ama yanglutsü atema state sorkari iba onük atema mapang nüngdaker aser civil societies o NGOs den maneni sensaksemtsüla" ta paisa ashi.

Naga Students' Federation (NSF)-i Combined Staff Recruitment Exam 2022 nung 12.5% nungi 5% ajemtsü akhangba atema Minister Along-isa "sorkari iba onük atema jungjunga asadangtsü mulunga lir" ta ashi.

"NSF-i sorkar nem shisadangdaksünür. Nagaland Staff Selection Board (NSSB) ya tasen asü nung tenüingdakba aika lir" ta paisa ashi.

Rio lenisüba kübok cabinet-i item onüktem atema külemi telemtebatem agitsü aser NSF-ia itemji agizüktsü imlar, ta Along-isa ashi.

NSF ya Naga nungertem tongtipang telok ka lir aser sorkari parnoki ola adokba angatsüla, ta paisa shisem.

Naga Heritage Village, Kisama merüketba mapa ya Dr. Keneihoulie Medom ajanga ketdangtsü inyaker. Pa ya Kohima nung Guest House ka kibur lir.

Anogo 10 nü Hornbill Festival

nung dang masü saka küm piyong tourist temi Kisama semdang anungji merüka ayutsüla ta Dr. Keneihoulie-isa ashi.

Iba tebilemba ya pai Tourism & Higher Education Minister Temjen Inma Along den lemsatep aser paia kanga mulunga agizük ta Dr. Keneihoulie-isa ashi.

Tanü Naga Heritage Village, Kisama merükmejuba maparen nung Tourism Department, Para Military force aser college kaketshirtemia yaritepa liasü.

Tanü Tourism Department, 1st Assam Rifles, 164 TA Battalion, Haryana Police IR Battalion, Japfü Christian College Kigwema & Kohima College kaketshirtemia yaritep.

Maneni, MLA Dr. Tseilhoutuo (Ato) Rhütso, Commissioners & Secretary for Tourism I. Kitto Zhimomi, Commandant 1st AR Col. Umesh Sati aser Tourism Director Keduosie-ü Metha nungertem iba sentong nung shilem agia liasü.

OFFICE OF THE JAMIR KIDONG MOKOKCHUNG VILLAGE TENÜNGSANG ASER TEPELA LEMSATEPER

Shri. N. Bendang Jamir, President NDPP Mokokchung Region nung inyaka aliba, pa dak sempet tajung aser mapa ajak nung jeta inyaketba ngua NDPP party-i (2021-2024) tashi State Level nung NDPP working president inyaksü shimtetba atema Rio Government dang kangasa pelaba lemsateper.

Tsüingremi lenir taküm maneni ajungketa moajangni ta Jamir kidong tenüing nung lemsateper.

Kidong tenüing nung,

1. R. Kilen Jamir (Tatar)
2. T. Longri Jamir
3. T. Akang Jamir
4. L. Tia Jamir

UNICEF aser DoHFW lungjemshir inyaksü pangjem



Commissioner & Secretary, Health & Family Welfare, Govt. of Nagaland, Y. Kikheto Sema, IAS (tiyong) den Assam aser North East India atema Chief Field Office, UNICEF, Dr. Madhulika Jonathan (abelen) aser Principal Director, DoHFW, Nagaland Dr. Vibeitunuo M Sachu (achichi) nungertem noksa nung angur.

Dimapur, Rongchii/April 19 (TYO): Assam aser North East India atema Chief Field Office, UNICEF, Dr. Madhulika Jonathan aser Ashish Dadwal, Health Specialist, North East State (Except Assam) nati April 19, 2023 nü Shri Ashish Dadwal, Health Specialist, North East State (Except Assam), Commissioner & Secretary, Health & Family Welfare, Govt. of Nagaland, Y. Kikheto Sema, IAS aser Principal Director, DoHFW, Nagaland Dr. Vibeitunuo M Sachu na ajuru aser Department of Health & Family Welfare (DoHFW) indang IDSP Conference Hall, Kohima nung Department indang ketdangsürtem den senden ka mena liasü.

Parnok pela agizükba mapang state nung RMNCH+ A (Reproductive Maternal Newborn Child and Adolescent Health) tsütsü tanen makai yariba, Aspirational District yariba aser COVID-19 mapang

mozü aser oset balala mapang shidak nung agüja yarba atema Y. Kikheto Sema-i UNICEF dang pelaba lemsatapa liasü.

COVID-19 pandemic mapang state nung meranga inyakba aser kinü tanur asür ajema aliba atema Dr. Madhulika-ia iba mapang tenüngsang agüja liasü.

Kinü tanurtem takum kumzüka alitsü asoshi antenatal care coverage, institutional delivery, aser full Immunisation coverage tsütsü temolung agütsütsü nüngdaker, ta lai ashi. State nung aliba blood bank services tem tajungtiba nung amshitsü nüngdaker, ta lai ashi.

Nüngdakba pur nem azü agütsütsü asoshi asen nübunem awareness agütsütsü nüngdaka lir, aser azü tenla agütsür aser talisa Armed Forces temi Nagaland nung molungsoa azü tenla agütsüba atema pelar, ta Kikheto-i ashi.

State aser UNICEF na maneni RMNCH+A nung

capacity building, technical support, supportive mentoring visit amala nung lungjemer inyaksü aser ano nüngdakba mapang maparen balala nunga yariteptsü pangjemtepa liasü.

Commissioner & Secretary, DoHFW ajanga health facilities tem yanglushitsü nüngdakba, arogo aser tamangba yimsü lenirtem ajanga awareness agütsütsü nüngdakba shia liasü aser UNICEF-ia yariteptsü molunga aliba lemsatapa.

Y. Kikheto Sema IAS ajangasa UNICEF den maneni lungjemer inyaksü ayongzük aser ano tanur asoba, kinü tanur aser tanur indang health tsütsü terenlok mapa külemi inyaksü ayongzükba liasü.

UNICEF aser state lungjemer inyakba maparen iba senden ajanga tali akangshitsü, ta pai ashi. UNICEF ketdangsür temi mozüki kar sema jaja aser healthcare nung inyaker den sensaksem kaa liasü.

Centre for Policy Research-i NCS (P) nem training agütsür



NCS (Probationers) 2023 Batch den CPR, New Delhi nungi shisalen sayur aser KMC ketdangsürtem April 19, 2023 nü Sepfuzou Ward, Kohima nung Solid Waste indang data bendenba exercise agidang tangokba noksa nung angur.

Dimapur, Rongchii/April 19 (TYO): Department of Personnel and Administrative Reforms, Government of Nagaland ajanga sponsor süa April 11, 2023 nü nungi tenzüka hopta trok atema NCS (Probationers) 2023 Batch asoshi Special Induction Training ka Administrative Training Institute nung Centre for Policy Research, New Delhi ajanga agütsür.

Centre for Policy Research (CPR) ya 1973 küm tentet aser India nung mongin temi tentetba shisa agütsür tentet ka lir.

CPR ya non-profit, non-

partisan, independent institution ka lir aser research agütsü atema inyaker aser parnoki scholarship tajung, policy tem tajungba kuma yanglushiba nung shilem tulu agir.

CPR nungya India nunger teshisadanger aser policy practitioners tem lir aser parnoki sentong balala yangluba nung research agidak yakbang sür inyaker.

Parnoki maparen balala nung aroka research agir aser 21st century nung India asoshi tayongzükba tem nung rangloker.

Iba training nung parnoki

Values and Skills for the 21st Century Civil Servant, Essential Knowledge: Overarching Issues aser Sector Knowledge amala onüktem nung shisa agütsütsü.

Iba training nung shisalen sayur ya Deepak Sanan (IAS ret'd.), Senior Visiting Fellow, Dr. Mekhala Krishnamurthy, Senior Fellow aser Dr. K Rahul Sharma, Fellow alitsü aser parnok ajak ya Centre for Policy Research, New Delhi nung State Capacity Initiative nung sendaktepa lir aser wadang balala nung mongintem lir.

Aor pensioner atema medical camp ka akatsü

Dimapur, Rongchii/April 19 (TYO): Dimapur District Aor Pensioners' Telungjem ajanga Aor Pensioner tem atema Free Medical Camp ka April 22, 2023 nü Dimapur Mission Higher Secondary School, Khermahal

(DABA) nung anepdang 10:00 ako nungi akatsü, ta sangdong ka ajanga ashi. Iba camp nung Aor pensioner ajak arua temaotsü agütsü ayongzük, ta sangdong ajanga ashi.

Kohima DC-i pensioner tem dang metetdaksür

Dimapur, Rongchii/April 19 (TYO): CEO, Nagaland Health Protection Society, Nagaland nungi shiti aruba ama, Kohima district kübok pensioner ajak dang PUC Card tem agizüksü aser Registration maparen

Deputy Commissioner, Kohima indang office nung aliba CMHIS Cell (Ground Floor) nung inyaksü metetdaksür, ta Deputy Commissioner Kohima Shanavas C ajanga sangdong ka nung metetdaksü.



Dimapur District Welfare Society ajanga teyari mapa inyakba nung shilem ka ama Deputy Commissioner, Dimapur, Sachin Jaiswal, IAS ajanga computer set tem amoktsüba mapang tangokba noksa ka yangi angur.

Mokokchung DC-i Governor's Award atema tenüng meshir

Dimapur, Rongchii/April 19 (TYO): Directorate of Art and Culture, Nagaland nungi shiti aruba ama arts, music aser literature nung dangar dak nungi alakteta alir nem Governor's Award 2023 agütsütsü atema District Level Committee ajanga atidanga aser shimtsü asoshi temsüa alirtem tenüng meshir, ta Deputy

Commissioner, Mokokchung, Shashank Pratap Singh, IAS ajanga sangdong ka nung metetdaksü. Nübu tejangja lira pa indang office mesüra office of the District Cultural Officer, Mokokchung nem April 24, 2023 tashinung tenüng agütsütsüla, ta sangdong ajanga ashi.

School Education department ajanga metetdaksür

Dimapur, Rongchii/April 19 (TYO): Office ajanga taoba mapang April 5, 2023 nü Assistant Language Officer ama inyaksü atema regular State Cadre Sr. Graduate Teachers nungi application meshiba tarutsü nung totuyuba ka magütsü tashi soita atar, ta Thavaseelan K IAS, Principal Director, School Education ajanga sangdong ka nung

metetdaksü. Ano kija/Societies/Trusts/lokli tentet balala dang sangdong ka nung, state nung nija school tasen (New Private State Schools) lapoktsü atema application form ya Directorate of School Education, Kohima nung April 3 nungi May 31, 2023 mapang angutsü, ta Principal Director sangdong ka ajanga ashi.

"Basics of educational research" kaket saya



Member of Parliament (Rajya Sabha), S. Phangnon Konyak den Dr. Visiezolie Yashii aser dangartem April 17, 2023 nü Kohima nung "Basics of educational research" kaket sayadang tangokba noksa nung angur.

Kohima, Rongchii/April 19 (TYO): Member of Parliament (Rajya Sabha), S. Phangnon Konyak ajanga April 17, 2023 nü Kohima nung "Basics of educational research" nungja agüja aliba kaket ka saya liasü. Iba kaket ya Dr. Visiezolie Yashii-i zülü aser Dimapur Publishing House-i adoka liasü. Iba kaket sayaba sentong ya

Kohima College, Kohima nung agia liasü, kong Dr. Theyiesinuo Keditsu, assistant professor, Kohima College, Kohima menden liasü. Sentong nung Tsüngrem temoatsü jazüka Mhasiseli Theinuo, pastor Central CRC, D' Block Kohima ajanga sarasadem aser Mhalezonuo Khruomo-i temeja ken ka tena liasü.



April 19, 2023 nü Apple CEO, Tim Cook-i Mumbai nung Akanksha Foundation school ka semdangba mapang kaketshirtem aser tesayurtem den külemi tangokba noksa nung angur.

Kasa kiyimba ken o angadangba nung state tem dendaktsütsüla: Centre

New Delhi, April 19 (Agencies): Bodhbarnü Centre sorkari Supreme Court dang, kasa kiyimba (tetsür o tetsür na mesüra tebur o tebur na kiyimba) onük nung Centre-i state tem den jembidar, kechiyong state temji tongtibang stakeholders lir, ta metetdaksü.

Centre tenüing nung jembitsür Solicitor General, Tushar Mehta-i judge pongui akümba Constitution bench dang, kasa kiyimtsü atema temepishiba ken o angadangba nungji state tema dendaktsütsüla, ta ashi.

Judge pongui akümba bench nung tongtiji Supreme Court Chief Justice, DY Chandrachud lir aser züngsemtemji Justices-SK Kaul, SR Bhat, Hima Kohli aser PS Narasimha nung lir.

India nung kasa kiyimba melatsü atema temepishiba ken o aika Supreme Court nung benoka lir, aser tanü agi parnoki anogo ananübuba item ken o angadangogo.

Centre sorkari Supreme Court dang affidavit ajanga, "Anungji iba ken o angadangba nung states aser Union

Territories ajak shilem agidaktsütsü aser parnok tangatetba angadangtsü mepishir, state tem den iba onük nung o lemteptsü aser parnok tangatetbatem angadangtsü atema India Union nem temelaba agütsütsü mepishir; iba sülen Centre sorkari iba court matsüngdang ken o benoktsü," ta metetdaksü.

Centre sorkarisa, "Supreme Court-i iba onük nung kechi telemtetba agidir agiaka state temi ozüing yanglutsü temeden aliba ajanga ibaji kongshitsü. State temi iba onük nung telemtetba agia lir, anungji iba onük angadangba nung parnok dendaktsütsüla aser parnok ken oa angadangtsüla," ta metetdaksü.

Yaküm November 25 nü Supreme Court-i Centre sorkar dang, kasa kiyimba melatsü aser ketdangsertem dang iba temedenji Special Marriage Act nung züngoktsü atema temepishiba ken o tem agüja lir, anungji iba onük nung nenok tangatetba metetdakjang, ta tuyua liasü.

Taoba ita tomtem Centre-i affidavit ka ajanga SC dang India nung kasa kiyimtsü ozüing ajanga magizüktsü metetdakja liasü.

Centre-i SC dang, kibong mekümi tetsür o tebur na külemi ki ka nung aliba aser kasa tetsür o tetsür na mesüra tebur o tebur na shi nung medembaji tangbo ozüing alema masü, ajisüaka ibaji India nung kibong den medemangtsü makok, kechiyong India nung kibong kaji- kinüingbu ka, kinüingtsü ka aser tenati sosemba tanurtem lir, ta shia kasa tetsür o tetsür na aser tebur o tebur na kibong akümba ozüing ajanga agizüktsü atema mepishibaji magizüktsüla, ta metetdaksü.

Centre-isa, tebur ka aser tetsür ka kibong akümbaji personal laws mesüra codified laws kübok lir; item ozüing rongnung Hindu Marriage Act, 1955, Christian Marriage Act, 1872, Parsi Marriage & Divorce Act, 1936 mesüra Special Marriage Act, 1954 mesüra Foreign Marriage Act, 1969 lir, ta court nem metetdakja liasü.

Karnataka nung PM Modi densema lenir 40-i BJP atema nübo ayimtsü

Bengaluru, April 19 (Agencies): Karnataka Assembly election atema Ato kilonser Narendra Modi, BJP National Tir JP Nadda, Uttar Pradesh chief minister Yogi Adityanath aser Union minister tem ajak senteper nisung 40-i BJP atema nübo ayimtsü.

Union minister tem rongnung Rajnath Singh, Amit Shah, Nitin Gadkari, Nirmala Sitharaman, Smriti Irani, Dharmendra

Pradhan, Mansukh Mandaviya aser Pralhad Joshi nung densema lir.

Iba dak alia Madhya Pradesh chief minister Shivraj Singh Chouhan, Assam chief minister Himanta Biswa Sarma, Maharashtra deputy chief minister Devendra Fadnavis, Karnataka Chief minister Basavaraj Bommai, Karnataka nung BJP lenir tain BS Yediyurappa, taoba mapang

chief minister DV Sadananda Gowda nung den Karnataka nung minister kar aser state party lenirtemi party atema nübo ayimtsü.

May 10, 2023 nü Karnataka assembly election nung tokteptsüpur tongti party temji ruling BJP, opposition Congress aser JD(S) party tem lir.

Election agiba sülen May 13 nü vote zünga election agiba osang sangdongtsü.



April 19, 2023 nü Jammu nung taoba mapang Jammu & Kashmir National Panthers Party (JKNPP) lenir, Anita Thakur (tiyong) Democratic Progressive Azad Party (DPAP) nung adenba sülen tangokba noksa nung angur. Kasa noksa nung DPAP tongti, Ghulam Nabi Azad-a (abelen nungi tanabuba) angur.

India-i China nung nütüing ajangtetogo: UN

New Delhi, Rongchii/April 19 (Agencies): India nung nütüing ajak senteper crore 142.86 ajungba ajanga India-i alima nung nütüing teimba aliba linük, China ajangtetogo, ta Bodhbarnü United Nations (UN)-i metetdaksü.

Joko China ya alima nung nütüing teimtiba aliba linük tanabuba dang kümogo; iba linük nung nütüing crore 142.57 lir, ta UN indang statistics ajanga metetdaksü.

UN agency UNFP-i ashiba agi, India nung nütüing shilem 25 shi arrshi küm 0-14 tsüingdapurtem lir, nütüing shilem 18 shi arrshi küm 10-19 tsüingdapurtem, nütüing shilem 26 arrshi küm 10-24 tsüingdapurtem, nütüing shilem 68 arrshi küm 15-64 tsüingdapurtem aser nütüing shilem 7 arrshi küm 65 ser temapurtem lir.

India kübok Kerala aser Punjab na nung kanga tantsür-tambur nütüing aika lir aser Uttar Pradesh o Bihar na nung lanur nütüing aika lir, ta

mongintemi metetdaksü. Agency balala aikati asadangba ajanga bushitetba agi, India nung ano taruba küm 30 tashi nütüing kanga tali arentsü aser nütüing crore 165 ajungba sülen nütüing ajem tenzüktsü.

United Nations Population Fund (UNFPA) nung India nungi representative, Andrea Wojnar-i, "India nung nütüing billion 1.4 ji maongka billion 1.4 ama züngshitsüla," ta ashi.

"Lanur teimtiba- lanur million 254 (arrshi küm 15-24 tsüingdapurtem) aliba linük ka ama iba linük ya tasen apiteta inyakba, tasen shisatetba aser teti atema lenmang bushitetba linük ka südaktsütsüla," ta paisa ashi.

"Nütüing kanga arenyonga tetsürtem, talisa tetsür chanutem nem shisaliok aser skills maongka agütsüra, technology aser digital innovations maongka agütsüra, talisa information den tashi agütsüra itemji amshia tajangzük kanga angutsü," ta pai ashi.



April 19, 2023 nü Patna nung District Magistrate, Chandra Shekhar Singh den Enumerator staff temi caste census agidang tangokba noksa nung angur.

Atiq-Ashraf tepsetba ken o nung police ketdangser 4 anentsüogo

Prayagraj, April 19 (Agencies): Tawa Uttar Pradesh kübok Prayagraj nung yimtenren lenir, Atiq Ahmed aser par adianu, Ashraf na medical check-up agitsü atema police-i anir aodang nisung aseme tena khasetba dak sendakba nung mapa nung tamakok anguba atema Shahganj Police Station nung station officer densema police ketdangser pezü mapa nungi anentsüogo.

April 15 aonung Atiq aser par adianu na police aikati meiner hospital kati anir aodang nisung aseme tenaprongla khaset; mapa nungi anentsüsang Station Officer ji Ashwani Kumar Singh lir.

Iba tatalokba bushisüngdangtsü atema police-i Special Investigation Team (SIT) ka tentetba sülen Mongolbarnü parnoki police ajak dang asüngdangyaa liasü.

Bodhbarnep Uttar Pradesh kübok Prayagraj nung CJM court kati Atiq Ahmed khaseter asemprong anogo pezü police ket nung ayutsü melaogo.

Special Investigation Team-i temepishiba ka ajanga court dang tai tonglokja alir asemprongla dang asüngdangyatsü atema meshizüka liasü.

April 16 nü district court kati par asemprong anogo 14 nü judicial ket nung ayutsü tuyua liasü.

Taruba anogotem nung police-i tai tonglokja alir asem-Arun Maurya, Sunny Singh aser Lovelesh Tiwari nung dang asüngdangyatsü, talisa parnoki amshiba hadir (pistol) indang asüngdangyatsü, ta osang angazüker.

April 23 nü tai tonglokja alir asemprongla court matsüngdangi anir aotsü. Bodhbarnüa par asemprongla court-i anir oa liasü.

Par asem Prayagraj nung aliba Naini Central Jail nung puoka liasü saka Hombarnü Pratapgarh district jail-i anir ogo.

April 16 nü Prayagraj kübok Kasari Masari area nung Atiq Ahmed aser par adianu, Ashraf na asüpila sentong agiba sülen tasü mang remogo.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 20, 2023

Asenoka Medical College tenzüker

Tang alima aso tasenba 21st Century tenzüker Nagaland nung alirtem ajak atema osang tajungtibaji taküm 2023 küm nungi Nagaland nung Medical College tenzüksüba osang ya asütsü. Aji oda, Nagaland nung akhidang yangluba government kiojen ajak telaor aser tanü putu nung yanglu tenzükbba kiojentem merenemtetter aser ano külen tangari asenok dang 'okora' ajar ta alima tsüngdang koda-anga tokolak angüma atua mesayutet lia, Nagaland medical college tenzüka aotsü osang metetdaksüba yagi asenok ajak tejak terabo tentetdaksüogo. Atangji, Nagaland state kümer küm 60 buba nungang nisung 100 züngtettsüsa medical college tilaka tenzüktetbaji tangar asoshibo kecha balaka tenüngsangteptsüsa takok tuluka masütsüa akok saka asenok asoshibo ibaji takok kanga tuluka asütsü. Iba medical college dang ya Nagaland Institute of Medical Sciences & Research, Phriebagie (NIMSR) ta ajatsü. Iba osang yagi Nagaland state-a tangang akümer amai bilemer aser tangang electricity tesangwa agia Nagaland atong ama kanga sangwa-sangwaa bilemer. Joko, Nagaland nung National Institute of Technology (NIT) lir aser iba denji tang medical college lapoker, anungji ana den ya ano asenoki yaktasa Dimapur nung yanglutor aliba state stadium aser Kohima nung state high court renema lapoktet nungbo, tangar menepa masüyonga, Nagaland ya tangar state terabo mesüka akümtsü. Atangji, asenok okora asüba tangang tera nüchi dangi arur saka ano okora purtemi tagitsü meteta akümba agi tagitsü ajak pei meyong kümer mechiokli asüba mapang tamajung ka tang ajanga süir. Ajisuaka, asenoka meilongibo tokolak shisatsü salaa tangar meyong agi asen akatsüba masü saka asen meyong agi tangar kadaktsütsüsa shisa tenük lapoka tangatetba mapang tajung ka tenzüksü teimla tulu lir. Asenoki matatetter tang ashi, tang asenoki inyakba tim masüba mapa aser mapangtem ajak melena mapang tajung kaa arutsü aser idangjibo tanü asenok tangaleni kaketshisatsü tajung bushii aoba amai tangartemang asen limai arutsü. Iba mapangjibo tang asenok taneptsü bushii tangaleni aoba amai tangarang asen limai taneptsü bushia arutsü. Idangjibo, tangar kidang timtemseta mapa tilateri inyaktsü atema Naga lanurtem bendangeni maotsü, kechiyong asen lima nung aseni inyaktsüba mapa inyaker meinyakma adoktsü. Iba teimla ya shitak küma ataloktsü atema Nagaland nung kechisa lapoka inyakdir, shitak jungjunga inyakba tesem aser mapa asütsüla. Iba nükla nung taküm nungi lapokba Nagaland Medical College ya tetenzük dang nungi medical college-ji medical college ama, MBBS degree kisung agütsüba tesem ka masü, shitakba medical education aser knowledge agütsüba medical college ka kümdaktsütsüsa inyaktsü, sayutsü aser anepalutsü mulungtettsüla. Iba tangatetba nung Nagaland nung akaba osetjibo tangaria junger ta temulung lema bilemetsüsa shitak tajung asütsüla aser Nagaland medical college nung azünga ta peisasa nümadanga shitetsüsa ajaki pei linük tenzüker ama bilema inyaktsüla. Aji oda, NEET ajanga medical azüngtsü maongka angurtem rongnunga tajung purtembo Nagaland-i yoktsüsa NIMSR dakji tenüng tajung keta alitsüla. Ano, NIMSR ya tenzüka oa alidang, kopi melii Mon nunga medical college ka tenzüksü, anungji iba jagi Nagaland ya medical azüngdak tesem tajung ka kümadoktsü. Tajung kaji, medical college lapokba yabo tanga college lapokba amai masü saka kanga agi tajungba aser talila tajangzük kaji, medical college shia Hospital tulu tajung kaka alitsüla, kechiyong mozü kidang shiranga amongertem yariba nungiang medical azüngertemji tashidak aser taneptsü maparentem indang angazüksü. Aji oda, medical college ka lapokbaji nübortem asoshi mozü ki tajung ka lapoker asütsü. Atangji, NIMSR atema tang tetenzük dangbo Kohima Civil Hospital (Naga Hospital Authority) ya medical college hospital amai amshitsü saka ano kopi melii medical college anasa mozü kijia lapoktsü. Joko, asenoka okora nungi nüchi küma arur, anungji shisa tilala dener pei atema rongsen terara bendentsüba ya masü saka Nagaland ya asenok atema dang masü saka bendangertem asoshia taneptsü aser kaketshisatsü tajung angudak lima ka kümdaktsütsü bilema inyakdi.

OLEMSABANG

AROGO YABO ALIMA LOKTI-TENTET KA AMA MASÜ

~ L.Kika Pongener.

Alima nung tenteta akaba loktiliba ajunga ya nisunger shisatsü agi tentetba lokti-tentetem lir. Yimden ya sobaliba dak amendaker yangluba lokti-tentet ka lir. Ajisuaka, arogo yabo sobaliba dak amendaker yangluba lokti-tentet ka masü, aser nisunger shisatsü agi purateta yangluba lokti-tentet kata masü, saka shirnok temenen nungi temulung meyiper, Yisu Khristaji kü kümtetdakba aser kibur ta tebang agi nangzüker aser temulung nung amanger, aser tzü nung 'Baptir' parnokji arogo nung züngsem akümer. Alima temenen tammang tia nungi tesangwa dangi jatetbapurtemi arogoji aküm. Anungji arogo yabo alima yimden aser tanga loktiliba den khenyongi medemdangtsüla masü balaka ta angateter. Alima nung tenuki anguba arogo mezüngbuba tenzükbaji laishiba nung reprangdangra, Tenyartem mapang 'Tenem-nu Benjong' (Pentecost) anogo nung kodang tanela temeshi alu, iba mapang nung Peteri anir nutsüngtemi tanela temeshi agizüker külen, Yisu Khrista indang tasüita küli sua sayutsüngi, aser iba anogo nung nisung merijang asem shi temulung meyipa tzü nung Bapti, aser item temulung meyipabapurtem jagi Yirusalem nung mezüngbuba arogoji tenzükbba otsü asenoki angur (T.Mapa-2:41-42).


Alima yimden bangdak aser loktiliba nungbo tekolakji nisung kar nuburtemi shimteter, saka arogo nungbo kibur aser tekolakji Yisu Khrista dang lir. "Aser pai (Tsüngremi) Khrista tetsüng küpok ajak ayu, aser arogo asoshi ajak madak pa tekolak kümdaktsü" (Efesa-1:22). "Kechiyong kechi koda Khrista pa sasa temang kümtetdakba lia arogo tekolak lir, aji oda, kinungbuji kinungtsü tekolak lir" (Efesa-5:23). Iba laishiba tekong ana nungji asenoki Yisu Khristaji arogo nung tekolaka ta jangja-jangja shia angur. Ajisuaka, alima nung tenuki anguba arogo nung Yisu Khrista melena arogo anitsü asoshi Sannuker 'Pastor' ka nem arogoji anitsü tashi agüja nungloktsür. Anungji arogopurtem ajaki Pastor lenisuba nungji Yisu Khrista dang ama akümtsüba aser tashi anga-a anidaker. Yisu Khristaji sannuker tajung (T.Ken-23:1) Anungji Yisu Khrista melena Pastor-ji sannuker tajung lir....ta asenoki laishiba nungjagi tejangja angur.

Ano arogo ya Yisu Khrista temang tenuk-telen ka lir. "Arogoji pa temang, aser shibai ajak nung ajak sungdaktsür pa tabensabaji arogo" (Efesa-1:23). "Aji oda, Khristai arogoji mesür aser anepalur, kechiaser asenok pa mang tenuk-telen lir" (Efesa-5:30). Aji oda, arogo ya Yisu Khrista temang aser pa mang nung tenuk-telen shilem ka ta laishiba tekong ana nungji jangja-jangja shia angur. Ano arogo ya Yisui pa azü agi alangzük, kechiyong Yisui pa temang rangben kangki nung tenla agüja, pa azü tokshiba ajanga mimchirtem temenen nungi teti taküm senmang tekümtet renemtsü, aser Yisui alangzükapurtem shirnoki Yisu Khristaji kü kibur aser kümtetdakba ta agizüka amanger, item telok dangji arogopur ta ajar, aser item telokji longjemer arogoji aküm.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Discipleship Bible College pur 40buba Convocation sentong agi



April 19, 2023 nü Dimapur nung Discipleship Bible College (DPC) pur 40buba Convoication sentong agiba sülen tangokba noksa nung angur.

Dimapur, Rongchii/April 19 (TYO): Bodhbarnü Dimapur nung Discipleship Bible College (DPC) pur 40buba Convoication sentong agiogo; iba sentong nung o jembitsü tejaokerji Dimapur Ao Baptist Arogo nung Pastor, Rev. I Wati liasü.

ayongzük. "Tsüngremi nisung ajakji nükjidong balala yur yanglu; yamaji Laishirtema wadang balala nung tenzüksü atema lezmükja lir. Tsüngrem sülen manidakibo Pa tenzüksüji tamakoktsü," ta paisa metetdaksü. Graduate asürtem nem tenüngsang agüja pai parnok dang, Kibuba wadang nung tetsüng majemokdangyongji

asenoki shiba tenzükera ibaji jungjunga tama shidadangtsüla, ta ayongzük. Kasa sentong nung DBC Principal, Rev. S Wati-i laishirtem ajungkettsütsü aser ajungshitsü atema award aser sempet balala sponsor asür ajak dang pelaba lemsatop. 40buba convocation sentong nungji Master of Divinity azünger 43 aser Bachelor of Theology azünger 32 graduate asü.

Baptist pastor aser televangelist, Charles Stanley süogo



April 19, 2023: Kaketzülür, televangelist aser Touch Ministries tentetsang, Charles Frazier Stanley Mongolbar anepdang alima nungi pilaogo; pa arrshi küm 90 liasü. Stanley ya Southern Baptist Convention nunga Tir inyakogo. Mongolbarnü Touch Ministries-i pa asüba osangji Instagram ajanga metetdakja liasü. Touch Ministries-i sangdong ka ajanga, "Dr. Stanley-i tashi anga ali, Yisu Khrista den tesendaktep tajung ayutsü tesayuba agütsütsü atema pai taküm bendanga agütsü. Tang pa tanela tepela nung lir aser pai Kibuba ajuruogo," ta metetdaksü. "Stanley'er kibong atema sarasademtsüba nung onok den yaritepang. Pa nüngtem nung ayongzükba memorial sentong intouch.org aser charlesstanley.com ajanga sangdongtsü," ta Touch Ministry-isa metetdaksü. Dr. Stanley ya 1932 küm September 25 nü Dry Fork, Pittsylvania County, Virginia nung aso. Pa tanur asüdangyongji tebu asüba sülen pai Kibuba wadang nung ajemoktsü atema telemtetba agia liasü. Stanley-i University of

Richmond nung BA renem, Southwestern Theological Seminary nung BD renem aser Luther Rice Seminary nung M.th renemba den külemi kasa Seminary nungisa doctorate of theology angu. 1969 küm nungi Stanley-i Atlanta nung aliba First Baptist Church nung inyak aser 1971 küm nung pa iba Arogo nung senior pastor aküm. Tesüsa 2020 küm September ita nung pa pastor nungi anisüngzükba liasü. 1972 küm Stanley-i local Atlanta television program "The Chapel Hour" tenzük aser tesüsa nüngjaji "In Touch with Dr. Charles Stanley" ta melen. Touch Ministries indang Facebook page ajanga, "Onok mission ji alima tesem ajaklen nübürtem Yisu Khrista den tesendaktep tajungba kümdaktsütsü aser Arogo indaktsütsü atema lir," ta metetdaksü. "Onok indang program ji alima tesem ajaklen radio aser television outlets 2,600 ajanga angashir aser angur, aser itemji oshi 50 dak tema ajanga sangdonger," ta parnokisa metetdaksü. National Religious Broadcasters-i 2018 küm 'Hall of Fame' nung Stanley züngoka

liasü aser 2020 küm March ita nung pa nem NRB Chairman's Award agüja liasü. 1980s mapang nung Stanley-i Southern Baptist Convention nung küm ana Tir inyaka liasü. Iba convention ya US nung Protestant denomination indang convention tulutiba lir. 2010 küm pa tamalen azüngba Southwestern Theological Seminary-i pa nem tetushi agütsüba sentong ka nung jembidang Stanley-i, "Tsüngremi nü dang kechi inyakang ta shidir aji inyakang," ta ayongzükba liasü. Kasa sentong nungji jembidang pai, "Kü nükjidong ka lir- akokba tashi nisung aika den Khrista osangtajung lemsateptsü, tekaraba nung ibaji inyaktsü, tongmelang agi inyaktsü aser Tanela Temeshi tashi amshia aser Tsüngrem tenüng sentsüwangshidakja inyaktsü; ibaji kü nükjidong lir," ta lemsatepa liasü. Stanley-i Christian devotional kaket aika züluogo aser item rongnung A Man's Touch, Handle With Prayer, Into His Presence, Waiting on God: Strength for Today & Hope for Tomorrow, Prayer: The Ultimate Conversation & When the Enemy Strikes aser The Keys to Winning Your Spiritual Battles densema lir. 1958 küm Stanley-i Anna Stanley den kibong aküm aser tena tanur ana- Andy aser Becky sosema lir, ajisüaka 2000 küm bala. 2020 küm September ita nung pa arrshi küm 88 ajungtsü hopta ana dang lia pai First Baptist Church nung senior pastor nungi anisüngzüktsü sangdonga liasü.

ANOGO ABEN TSÜNGREM DEN

Tematiba Mapa T. Ken 100:1-5

Nai Tsüngrem tenüng asangba ken atandang Laishiba nung Tenüngsang Ken 100 kaji atener ta bilemettang. Iba ken nung Kibuba koda külemtsü tetuyuba agütsür. Shibai Kibuba külemtsü ? "Nenok alima ajak, Kibuba dang tepela ola yokang" (t.1). Tsüngremi alima ajungai Pa külemdaktsüner aser tenüng sangdaktsüner. Kechiba asenoki alima ajaki oa osangtajungji sayutsüla ? Kenü alimai Kibuba dangi tepela ola yoktsü atema. Asenoki Kibubaji koda külemtsü ? Mezüngbuba, tenzükba ajanga. "Tepela agi Kibuba tenzükang: Pa tsüngdangi ken tena arung" (t.2). Asenoki tepela agi Kibuba tenzüksüla kechiaser asenok mulungjang nung tepela lir aser Kibuba tepelai asenok nem tashi agütsür. Tanabuba, asenok ken agi Kibuba tenzüksü akok. "Kibuba tsüngdangi ken tena arung." Asenoki kenji tentet mapa ka ama dangbo matentsü. Ken kaket amer ken atener saka asenok mulungjangbo talang nung pilar alir. Ken nung ashiba tetezüji shisadanga atentsüla. Asenoki Pa nem bendanga agütsüba ajanga Pa külemer. "Kibuba, Paji Tsüngrem ta nenoki metatang: Pai asenok yanglu, aser asenok Pa chiyimdak chiyimba santem" (t.3). Pa nem agüjang. Pa anidakang. Pa dang tashi angang. Tatemsa asenoki tenla agütsüba ajanga Kibuba külemer. "Tenüngsang agi Pa süngkümi iang, aser Pa talidaki sanga iang; Pa dang tenüngsang agüjang, aser Pa nung moajang" (t.4). Nai tenla sabang nung shiruru agütsütsü menüngdak, saka nai ne mapang, sen aser temetetba agütsütsü akok. Kechiba asenoki Kibuba külemtsüla ? "Kechiaser Kibuba tajung lir; Pa temeim taochi aser putu ajak dang Pa temulung lemtetba, tatem maka" (t.5). Khristan taküm nung tematiba mapaji Kibuba külembaji lir. Ne taküm kodanga tematazütsü ka tesüdaktsü. Tepela aser tenüng asangba mulungjang agi ken tena, bendanga agüja aser tenla agüja Pa külemang.

Christian Post-i Evangelical Press Association award pezü angu



April 19, 2023: Christian Post-i 2023 Evangelical Press Association Christian Media Convention award pezü tashi nguogo; award agütsüba sentong nungji Khristan ministries, melungtet teloktem aser media organization balala nungi aika aden. Christian Post nung executive editor, Dr. Richard Land-i "The Will Smith event: Why it matters" ajanga yimobilem award tanabuba jenjang angu. Christian Post indang 10-episode podcast series "Generation Indoctrination: Inside the Transgender Battle," ajanga Podcast category nung tanabuba jenjang angu. Christian Post-isa Critical Review category nung "Texas megachurch glorifies the incarnation in 'Gift of Christmas' extravaganza" ajanga jenjang pezübuba angu. Interview Article category nung Ryan Foley-i Enes Kanter Freedom interview agiba ajanga jenjang pezübuba angu.

AO OSHI ANGAZÜKDAK:
TANÜ ANGAZÜKTSÜBA OJANG



Ponglok

(v) joka tur amlok (jump unto)

* Azü tulubai kü dak **ponglok**.

Pongok

(v) süngzü amloktsü, lisü mesür enok (slip on)

* Nashi tekong nung süngzü **pongoker** anir ao.

OLONG PAITEP # 6490

	1				2	3			
4			5						6
						7			
	8								
	9			10				11	
						12			13
14									
						15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsü mapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6489 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



NÜNGTOKU SAYUTSÜNGIR KA GARI
KANGA SPEED AGI ANIR OYA LIA
POLICE-I ARISHIA MENEPER :

Police : Sir, na gari kanga karaa aniba ya ozüng alema ato, na jemer anira na?

Sayutsüngir: Aito, ni tzü jemer anir ako.

Police : Aya, tzü dang ajem nung kudasür yi menemer?

Sayutsüngir: "Oh Lord" tesüngmangtsüa, Yisui Kana yim dak keyir benjung nung Tzü agi Yi kümdaktsüba amatoa ya, nibo tzü dang ajemasüng!

Lilir: WhatsApp

Tanur asoba anogo nung salem osang den noksa angati adokdaktsünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Lunglei district jail nungi nisung 5 jena ao



Aizawl, April 19, 2023 tashi jena ao.
(Agencies): Mizoram nung April 19, 2023 nü Lunglei tepuokdak ayur nisung pungu district jail nung puoka alir nisung

5 jena ao.
Bodbarnep yakta parnok Lunglei jail nungi jena ao aser parnok rongnung nisung tepsetertem dena lir.

Tanep 2:00 ako meta parnoki tepuokdak metsümeshidak jara kakpoker jena ao. Tanep 1:30 ako nung jail ketdangsürtemi rounds aodangbo parnok pei pei ward nung dang liasü.

Lunglei district jail nung tepuokdak ayur nisung 40 lir aser parnok rongnung 5 jena ao.

Ano, nisung ana tashi NDPS act kübok ken o benoka lir. Mizoram nung security agencies-i parnok aputsü atema bushitep tenzükogo.

Par pungu ya Lalbawihliana (27), Dokaphang (26), Haudeihchhin (25), Vanneihthanga (38) aser Vanlalduati (24) nunger ta jangjaogo.

Arunachal den arrtsü atema MoU ka sign asütsü: Assam Minister

Guwahati, April 18, 2023

(Agencies): Assam aser Arunachal Pradesh tsüngda arrtsü ken o angateteptsü atema memorandum of understanding ka nung sign süteptsü ta Assam Minister Atul Bora-i ashi.

Assam-i iba atema draft MoU ka renemogo aser Arunachal Pradesh dang yoktsü ta pai ashi.

"MoU indag draft atema kanga junga olemtepogo aser parnok den lemsateptsü. Parnoki mulunga agizükra April 20 mesüra tan ita tsüngdasa sign süteptsü" ta Bora-i ashi.

Chief Minister Himanta Biswa Sarma-i anir senden ka amenba sülen pai iba osang metetdaksü.

Union Home Minister Amit Shah tsüngdang state anati MoU nung sign süteptsü ta Minister

Bora-i ashi.
"Ajisüaka MoU ya tatembang masü. Okadak aser Parliament lir" ta Border Area Protection and Development Minister-isa metetdaksü.

Assam nung regional committees 12 züngsemtem, local MLAs, MPs aser district administration ketdangsürtemi draft MoU renemba senden nung aden.

Assam CM Sarma aser Arunachal CM Pema Khandu nati anir state ana tsüngda arrtsü mangatetep angateteptsü atema jembitepa arur.

Yaküm July 15 nü Namsai Declaration nung sign asü dang angateteptsü atema tezüngzüktep agia liasü.

State anati 'disputed villages' 123 aliba nungi 86 akümstsü

lemtet. Yaküm regional committees balala tentet aser iba nung state anaprong nungi ministers, local MLAs aser ketdangsürtem aden.

Assam aser Arunachal Pradesh tsüngda kilometer 804.1 agi arrtsütepa lir. Arunachal Pradesh ya 1972 nung union territory aküm aser parnoki ashiba agi lendenlen aliba aremtemji hill tribal chiefs aser communities indang liasü aser ajaki mulungtepa Assam nem agütsü.

1987 küm Arunachal Pradesh state akümba sülen tripartite committee ka tentet aser parnoki Assam nungi Arunachal Pradesh nem ali kar agütsütsü ashi. Ajisüaka, Assam-i iba ya magizük aser Supreme Court nung ken o benok.

Dibrugarh nung yipru tesashi süidang nisung 1 asü

Dibrugarh, April 19, 2023

(Agencies): Bodbarnep Assam kübok Dibrugarh district nung yipru tesashi ka süidang nisung ka asü.

Tanep 4:00 ako meta Dibrugarh district ajungalen yipru tulu süi ta osang angazükur.

Iba mapang kiojen aika raksatsü. Talisa Moran, Lahowal

asur Chabua nung yipru agi kanga mejungi kongshi.

Tamulbari tea estate nung süngdong ka laodang arishi küm 60 tain Sukurara Mura asü. Mopung tesashi jagi süngdong ka lar kidang laodaktsü ta Assam State Disaster Management Authority (ASDMA) Dibrugarh district project officer Deepjyoti

Hatikakoti-i ashi.

La Assam Medical College and Hospital (AMCH)-i anir ao saka mekümzük. Iba lendong nung nisung aika yiruba osang lir ta Hatikakoti-isa ashi.

"Onoki takoksa ajurubatem asadangdar. Kiojen aika raksago aser süngdong aika lao" ta paisa ashi.



Assam nung Goalpara district kübok Brahmaputra River nung angopur kati ango tulu ka apuba noksa nung angur. Bodbarnep Musa Sheikh ta ser angopur kati seret 120 ango apu aser iba ango dang Assam nungeri Gorua ta ajar. Assam nung shishilembadak tilatem nung iba ango indang jenjang Rs 1,10,000 shi asütsü ta osang angazükur.

GOVERNMENT OF NAGALAND
DIRECTORATE OF WOMEN RESOURCE DEVELOPMENT
NAGALAND, KOHIMA.

NO.DWRD/DEV/MTC-4/2021/185

Dated Kohima, the 19th April 2023.

CORRIGENDUM

In Supersession to this department Advertisement of Even NO.DWRD/DEV/MTC-4/2021/159, dated 7th April 2023, it is hereby notified that the interview scheduled to be held on 21st April 2023 at Multi Training Centre (MTC) Directorate Compound Meriema, Kohima and Training Centre (MTC) Purana Bazaar, Dimapur is postponed to 28th April 2023. The Last date for submission of Application is also subsequently extended till 26th April 2023. The centre for interview and timing shall remain the same.

Sd/-
(VILONE SAKHRIE)
Director

Biden'er kibongi 2022 kum taxes atema sen \$137,658 agütsü

Washington, Rongchii/April 19 (Agencies): United States Tir Joe Biden aser pa kinungtsü Jill nati taoba kum sen \$579,514 aazük aser federal income taxes nung sen \$137,658 agütsü. Ibaji tax rate shilem 23.8 alitsü, koba US nung kilen shia average shile 14 dang timba alitsü.

Tesüiba kum asem nung Biden aser kinungtsü nati sen aazükba tajemba akumba sayur, aser tenati 2020 aser 2021 nung sen \$600,000 dak tema aazükba liasü. 2021 kum US nung takara amasü aser sensaker amasü, tiyongtsü nung alir kibongi sen \$69,717 aazükba liasü, ta US Census Bureau ajanga ashi.

White House ajanga Biden aser pa kinungtsü, Vice Predicent Kamala Harris aser la kinungbo Doug Emhoff nungeri tax agütsüba osang Mongulbarnü sangdonga liasü.

Biden jakdang inyaksang Donald Trump kübok tax agütsüba maparen nung mangatetep adoka liasü, kechiaser pai menokba taxes miimshia ayu aser tatemsa kum trok menokba taxes osang taoba kum House committee ajanga sangdongdaksü.

Biden aser kinungtsü tena income ya 2019 kum sülen ajema akum, aser iba mapang sen million \$1 jungnüa kakat ayokba, sentong balala nung o jembiba aser University of Pennsylvania aser Northern Virginia Community College nung tesayur mapa inyakba nungi aazükba liasü. Taoba mapang tatong tir aser Delaware senator yagi o jembidang sa mapang ka pa Senate nung tesensaktiba züngsem ka liasü ta shia aru aser iba mapang Washington nung ki kata malitet aser Amtrak nung senzua liasü ta ashi.

Mongulbarnü Rose Garden nung tanur anepalutsü indang jembidang, pai Delaware nung ki kata meyetet aser senator ka ama kum 36 inyakba mapang Washington nunga par kibong asoshi ki kata malitet, ta Biden-i shia liasü.

Tir ka ama Biden ya itasen \$400,000 angur. Pa kinungtsü Jill ya Northern Virginia Community College nung tesayur inyakba atema sen \$82,335 agütsür. Tenati Delaware nung state taxes \$29,023 aser Virginia nung \$3,129 agütsür.

Tenati charity balala 20 nem

sen \$20,180 agütsür. Sempet tulutiba ya Beau Biden Foundation nem sen \$5,000 agütsüba alitsü, koba teyari mebushiba tentet ka lir aser iba telok yagi tanur timtema amshiba samatsütsü asoshi inyaker aser tena jabaso Beau tenüing jalokja lir, shiba arishi kum 46 lia 2015 kum brain cancer agi asü. Tenati St. Joseph on the Brandywine nem sen \$1,680 agütsü, koba Delaware nung arogo ka lir aser yangji tir adener. Tenati Fraternal Order of Police Foundation nem sen \$2,000 agütsü.

Vice president aser la kinungbu nati tax agütsüba ajanga tenati sen \$456,918 aazükba sayur. Tenati jenjang 20.5 shilem nung federal income tax nung sen \$93,570 agütsü. Parnoki California income tax nem sen \$17,612 agütsü, aser Harris kinungbui Georgetown University indang law school nung inyakba atema District of Columbia income tax nem sen \$9,697 agütsü. Tenati charity atema sen \$23,000 agütsü.

US nung federal tax agütsütsü atema Mongulbarnü tatem liasü.

Afghanistan nungi ainshitsü UN renema lir

New York, Rongchii/April 19 (Agencies): UN kübok local tetsürtem inyaksü atema Taliban den sensaksem takok ngua magiteta May ita Afghanistan toktsür aotsü atema UN renema lir, ta UN Development Program tekolakbai ashiba Afghanistan nung amendaker aliba Khaama Press sangdong ka ajanga metetdaksü.

UN tang Taliban den sensaksemba mapang ka lir, aser local tetsürtem nem tenokdangba agütsür aliba agina parnok UN nung maneni inyaksü atema temelaba angutsü imla atadar.

UNDP administrator, Achin Steiner-i ashiba agi, "tang jenjang apir United Nations system ajunga tera atsüngina atar Afghanistan nung inyaksangshitsüba tashi asadangtsü nungdaker. Ajisüaka iba ya fundamental principles, human rights atema sensaksemtsüba masü."

Afghanistan anütoklen Nangarhar province nung Afghan tsür UN staff tem

mapai maotsü atema tenokdangba agütsüba osang angazüka tibilemstü ka-a bilemba United Nations-i tawa lemsatepogo, ta Khaama Press sangdong ajangsa metetdaksü.

UN-i ashiba agi, "Afghanistan nung Afghan tsür UN staff tem Nangarhar province nung mapai maotsü atema tenokdangba agütsüba United Nations-i kanga tibilemstü ka-a bilemba lemsatepogo."

UN-isa, Taliba dang taküm kumzüksü atema maparen balala benoka inyakba ya tetsür staff tem medeni tamakoktsü asütsü, kechiyong International organization indang staff ya timba tetsür lir, ta tekümdangtsü metetdaksüögo.

"Onoki ketdangsurtem dang tetsür staff tem medeni taküm kumzükba maparen balala benoka inyaksangshitsüba ta metetdaksüögo," ta UN-i tweet asüba Khaama Press-i metetdaksü.

ia bilemba lemsatepogo aser ashiba agi, tetsür staff medeni lokti tettemi nungdaka aliba tetsürtem metongtetsü.

2021 kum August ita Afghanistan sorkar atsüngba sülen Taliban puri tetsürtem nem tenokdangba balala agüja arudar. Parnoki tetsürtem school aser college temi aotsü memelar aser iba den mapa balala nung inyaksü memelar.

Taliban-i mezüing tetsürtem grade trok sülenbo school-i maotsü atema tenokdangba agütsü, iba sülen 2022 kum December ita ozüing ka benoka Afghan tsürtem higher education aser national aser international NGO tem nung minyaksü atema tenokdangba agüja liasü.

Tetsürtem nem tenokdangba balala agütsüba ya national aser international lokti tentet balalai aitsüögo aser iba ajanga Afghanistan nung kanga dang nungdaka aliba nürtertem nem teyari agütsüba inyakyim nung tetsükdaksü tulu adoktsü ta tekümdangtsü metetdaksüögo, ta Khaama Press-isa metetdaksü.

MULUNGNEN O

ASO:
11-04-1924

ASÜ:
12-04-2023

Onoki teti meima aliba Ojala Lensanir K. Talikumla Jamir (Mulungyimsen) Tsungremer arishi yungsük kum 99 abensa-a lir noklangzüng nung mejakoka lia 12-4-2023 anogo nung la arishi anogo tempang. La anema alidang nungi tenzüker arishi tempangba anogo tashi nung yimtsür yimer, temba tinu ajaki aria bilemba sarasadem den ali rongsen teyari, nübo aser shisatsu agi onok den yaritepogo nenok dangi tsungdong arua onok pelaba meshitetter, saka nenok temeim mapa nung Tsungremi tali moajangma ta sarasadema iba osangsep ajanga nenok den lemsateper.

~Temeim Chirnur, Semchir, Kinünger, Anük apanger.

**ALI AYOKTSÜ
LIR**

Foothill Road nungi 2 minute,
Hozukhe Village
Rs. 25/- per Sq.foot.
Contact : 8974869756, 8259001052

Kim Jong Un-i spy satellite yoktsü tuyuogo

Seoul, Rongchii/April 19 (Agencies): North Korea lenir Kim Jong Un-i ashiba agi, par linüki mezüingbuba military spy satellite yangluba renemogo aser sayatsü sentong aliba ama inyaksü ketdangsur dang tuyu, ta state media ajanga ashi.

Kim-i par linük indang National Aerospace Development Administration semdangba mapang, United States aser South Korea nungi timtem agütsüba den tokteptsü asoshi 'reconnaissance capabilities' yanglutsü kanga tongtipang liasü aser itdangiterba maparen tashi ita inyaksü atema satellites aika nungdaka liasü ta ashi, ta North Korea sorkar meyong KCNA news agency ajanga Bodhbarnü ashi.

Kim-i sentong yanglua aliba ama satellite ya yoktsü ajungshi saka anüngleni khaketa yoktsü asoshi anogobo mashi.

December ita North Korea-i spy satellite atema tongtipang aser 'final phase' inyaka liasü aser anüngleni yoktsü atema renemba maparen April tashinung tembangtsü shia liasü.

"Tsükchir sepai tensa indang osang mapang shidak nung metettsü ya tongtipangtiba mapa lir," ta Kim-i shia liasü.

US aser South Korea tsüngta tesendaktep ulushiba tenüing nung arr tena military campaign tem ulushir aser US-i South Korea ya tashiyim amshitsü tesem ka kumdaksüner aser region nung aircraft carriers aser nuclear-capable bombers amala hadir tem rara atema yokner, ta Kim-i tai tonglokja liasü.

North Korea indang nuclear tashi ulushiba nungi nokdangtsü nükjidong nung US aser South Korea mitkar temi lungjemer military drills tali agir. Tan hopta parnokino anogo 12 aerial exercise tenzüka liasü aser yangji rara nung amshiba tayimtsü 110 dena lir aser Japan den anogo ka naval missile defence exercise agia liasü.

KCNA ajanga noksa ka lemsatepba nung Kim-i satellite mesükba oset ka jakdang ketdangsur den jembia liasü. Pa meina par jala arua liasü, shiba tawa missile tendangba aser mitkartem sentong kar nung tebu den külemi noksa nung nguogo.

2022 kum North Korea-i missile aika tendangogo aser taküm kum tenzüker 30 shi tendangogo, aser Kim-i par linük indang mitkar tashi itshia tejakleni anitsü meranger.

Taoba hopta Pyongyang-i solid-fuelled Intercontinental ballistic missile (ICBM) ka tendanga liasü, koba mera tongtipang ka agitetba alitsü aser parnokino nuclear-powered submarine ka, hypersonic missile ka aser multi-warhead missile yanglutetogo, ajisüaka itemji amshitetsü asü masüar mejangja.

US-South Korea nunger drills agiba asoshi North Korea-i ashishiaka item tenüingji amer par tashi ulushir, ta aikati ashir.

Orbit nung spy satellite ka yutsütsü asoshi long-range rocket ka nungdaksü. Saka iba amala inyakyim United Nations-i nokdanga lir aser iba ya miimshia long-range ballistic missile technology tendanger ama repranger.

Pyongyang-i 2012 aser 2016 nung mezüingbuba aser tanabuba Earth observation satellites tem orbit nung yutsü, anungji UN-i tenokdangba tasen agütsü, saka satellite ka katia North Korea dangi imagery kecha meyoker ta bendanger mongintemi ashir.

UN pangzüng nung aibelenatang parnokino tanen makai noknün tendangaka North Korea nem temerenshi tasen magütsüteter, kechiaser UN Security Council nung permanent züngsem aser veto tashi amshitetba Russia aser China linüki US aser danga linük temi tenokdangba tali agütsütsü merangba nung tebu makumer.

Sangtemla Ward pur 4 Buba Mkg. Inter Ward Football Tournament Final asayatsü jenjang ngutetogo



4 Buba Mokochung Inter Ward Football Tournament tanabuba Semi Final Artang Ward aser Sangtemla Ward tsüngda asayadang tangokba noksa.

Mokokchung, Rongchii/April 19 (TYO) : Tanu Imkongmeren Sports Complex Mokokchung nung 4 Buba Mokochung Inter Ward Football Tournament tanabuba Semi Final Artang Ward aser Sangtemla Ward tsüngda asayaba nung Sangtemla Ward-i goal 2-1 agi Artang Ward kokteta Final asayatsü jenjang ngutetogo.

Tanu asaya tenzüker kelen minute 16 buba nung Sangtemla

ward nungi jersey No.9 R.Achi-i goal 1 yok aser ano maneni minute 32 buba nung Jersey No.10 Meyasenba-i goal 1 yoka par telok takoklen akum. Saka asayayonga aoba mapang nung minute 52 buba nung Artang ward nungi Jersey No.10 Jongpongnotang-i goal 1 yoktet aser asaya 2-1 ta akum.

Tia maka iba asaya nung sangtemla ward nung jersey No.11 Opanngtemjen Jamir

Yellow card achi.

Artang Ward puri teimla tulu nung kanga meranga asaya saka tatembangba minute tashi nung parnoki maongka magitet nung Sangtemla Ward-i goal 2-1 agi Artang Ward koktetaSangtemla Ward pur 4 Buba Mkg. Inter Ward Football Tournament Final asayatsü.

Final Match :

21-04-2023 (1:00pm)

Penli Ward Vs Sangtemla Ward

ICC T20I rankings: Suryakumar Yadav maneni temaba jenjang nung lir



New Delhi, Rongchii/April 19 (Agencies): Bodhbarnü sayaba ICC Men's T20I Batters Rankings nung India nung batter Suryakumar Yadav maneni temaba jenjang nung lir. Pa 2022 küm October ita nungi tang tashi temaba jenjang nung lir.

Ajisüaka 50-over format nungbo Surya-i junga masayateti arudar aser pa India nung batter tem rongnung golden duck asem atonga achiba mezüngbuba asaya kümogo.

Right-handed batter yagi rating point 906 ngua liasü aser pa tanabuba jenjang nung aliba

pakistan nung asayar Mohammad Rizwan (798) dang nungi point 100 dak tema agi timba lir.

T20 batter tem list nung India nung asayartem rongnung Suryaumar kija lir, shibai 2022 küm kanga junga asayaogo. Pai taküma New Zealand aser Sri Lanka den asayaba mapang kanga junga asayaogo.

Pa sülen India nung rongnung Virat Kohli jenjang tajungba nung lir. Pa 15buba nungi masetshi lir.

Bowler tem rongnung left arm pacer Arshdeep Singh tang jenjang 14buba nung lir aser pa

India nung bowler tem rongnung ajak dang jenjang tajungba nung lir. Kasa mapang nung Bhuvneshwar Kumar 19bubai asepzüka luogo.

All-rounders' list nung Shakib Al Hasan sülen Hardik Pandya tanabuba nung lir.

Kasa mapang nung T20I asaya asem nung wicket 10 agiba sülen Haris Rauf Pakistan nung bowler tem rongnung temaba jenjang nung lir.

Rauf ya taoba hopta Shaheen Afridi jakdang aser Shadab Khan sülen liasü saka pai Shadab-a ajatetogo aser pa tang jenjang pongu tejakdangi tua 11buba nung lir.

Maneni Ish Sodhi (620) aser Shaheen (624) nata jenjang pezü aser ana tejakdangi tuogo.

Sri Lanka nung asayar Prabath Jayasuriya-i Test asaya nung maneni kanga junga asaya arudar aser pai Ireland den asayaba mapang asaya ka nung wicket ter agia liasü.

Jayasuriya-i Test asaya trok nung wicket 43 agir lir aser pai asaya pongu nungbo wicket pongungu agiogo. Pa ICC Test bowling rankings nung 13bubai tua top 20-i iogo aser Sri Lanka nung test bowler tem ajak rongnung temaba jenjang nung lir.

ICC WTC final atema Australia squad sangdongogo

Sydney, Rongchii/April 19 (Agencies): World Test Championship (WTC) final aser Ashes asayamung mezüngbuba ana atema David Warner Australia squad nung züngoksemogo, ajisüaka selectors temi ano top order tem rongnungi Marcus Harris aser Matt Renshaw nata shimogo.

Warner tawa junga masayateti aruba ajanga tebilemsü ka-a liasü, saka India den June 7 nü nungi tenzüka Oval nung asayatsü aliba WTC final aser iba sülen England den Edgbaston aser Lord's asayatsü aliba Test asaya atema shimba asayar 17 rongnung züngoksemogo.

Warner den külemi opener ama asaya aliba Usman Khawaja-i melenba sülen Harris, 2022-2023 Test season tepeyong masayai arur tang team nung züngoksemogo.

All-rounder Mitchell Marsh-a 2019 küm sülen tang mezüngbuba Test squad nung Cameron Green backup ama shimogo aser England nung asosang wicketkeeper Josh Inglis-a team nung züngoksema lir.

Batsman Peter Handscomb,

all-rounder Ashton Agar, aser spinners Mitchell Swepson aser Matt Kuhnemann nung February aser March ita India nung asayaba mapang meshimi liasü.

"India nung asayaba dang nungi UK nung asaya ya khenyongi balaka lir aser conditions apir onoki asayartem melenshiogo," head selector George Bailey-i ashi.

England nung condition balaka asütsü imla-aka spinner Todd Murphy maneni shimogo. Pai India nung asayaba mapang kanga junga asaya liasü.

Bailey-isa, July ita Headingley, Old Trafford aser The Oval nung tatembangbuba Ashes Test masaya tsüngda asayartem asadangshitsü.

Squad:

Pat Cummins (captain), Scott Boland, Alex Carey, Cameron Green, Marcus Harris, Josh Hazlewood, Travis Head, Josh Inglis, Usman Khawaja, Marnus Labuschagne, Nathan Lyon, Mitch Marsh, Todd Murphy, Matthew Renshaw, Steve Smith, Mitchell Starc, David Warner.

Intercontinental Cup Bhubaneswar nung asayatsü

Rongchii/April 19, 2023 (Agencies): Tasembuba Intercontinental Cup football tournament June 9 nungi 18 tashi Bhubaneswar nung asayatsü.

Iba asayamung nung India den Lebanon, Mongolia aser Vanuatu ta team pezüi shilem agiba angutsü.

Team pezü rongnung Lebanon temaba jenjang nung lir aser parnok FIFA ranking nung 99buba nung lir aser parnok sülen India (101), Vanuatu (164) aser Mongolia (183) ta lir.

Iba asayamung mezüngbuba 2018 küm asayaba mapang India-i ako, ajisüaka 2019 küm Ahmedabad nung asayaba mapangbo India team pezübuba nungang tembanga liasü.

"Team pezü asayatsü aliba Hero Intercontinental Cup ya June 9 nungi 18 tashi FIFA International Window mapa asayatsü. Iba asayamung nung India den Lebanon, Mongolia aser Vanuatu-i shilem agitsü," ta All India Football Federation (AIFF)-i sangdong ka ajanga metetdaksü.

"Imphal nung March ita

international football asayaba tepela ajangshiogo aser tang linük nung tebur football asaya atema international venues tem renloka aoba nung Bhubaneswar adentsü," ta Secretary General Shaji Prabhakaran-i ashi.

"FIFA U-17 Women's World Cup asayaba mapang Bhubaneswar nunga asayaogo aser iba sülen Odisha sorkari infrastructure tajung kar yangluba nguogo," ta pai ashi.

India tebur national team taoba mapang Mongolia aser Vanuatu na den asayadanga mali. India aser Lebanon nabo taoba mapang trokben asayaogo.

Taoba küm June ita 8 nü Kolkata nung AFC Asian Cup Qualifiers Round 3 asaya nung Cambodia goal 2-0 agi akokba nungi tenzüka India team kidang asaya pongu tashi nung khen danga tamakok mongui asaya arudar.

Iba sülen Igor Stimac-i aniba team yagi Afghanistan (2-1), Hong Kong (4-0) aser Imphal nung tri-nation tournament asayaba mapang Myanmar (1-0) aser Kyrgyz Republic (2-0) kokogo.

BILEMDANGANG

"Pela alitsü atema pei dak dang keta lir."